



28. januar 2014

UPA 2015/143

Inatsisartut suleriaasianni § 36 naapertorlugu matumuuna apeqquuteqaat aallaavigalugu oqallittoqarnissaanik siunnersuut manna siunnersuutigaara:

Meeqqap illugiimmik angajoqqaaminik takunninnissaanut pisinnaatitaaffeqarnera naapertorlugu, tamannalu meeqqamut pitsaanerussappat, qanoq ililluta Inatsisartuni pilersarusiuussisarnermut pitsanngorsaaqataasinnaavugut. Taamatuttaaq ataataasut meeqqaminnik attavigissaarnerunissaannut pitsaanerusunik periarfissiisagutta meeqqaminnik tigungmiaqarsinnaanerat eqqarsaatigalugu ilaqtariit pillugit inatsisaatigut qanoq nutarterisinnaavugut. Aaqqiagiinngittoqartillugu isumaqatigiissitsiniarnissanut periarfissaqarnerunissaq, taamatullu meeqqap peqatiginissaagaluanik eqquutsitsisoqanngippat iliuseqarnissamut periarfissiinissat Inatsisartuni sulissutigisariaqarpagut.

(Inatsisartunut ilaasortaq Aaja Chemnitz Larsen, Inuit Ataqatigiit)

Tungavilersuut:

Ilaqtariippassuarni isasoortoqartillugu meeqqamut pitsaanerussaq naapertorlugu illugiimmik angajoqqaaminnik qanimut attaveqarluarnissaanut aaqqiinarneq ajornakusoortarpoq.

Ilaqtariit pillugit inatsisit danskit inatsisaasa ataaniipput, danskilli ilaqtariit isasoorsimasut pillugit oqalinnerat malinnaaffigigaanni meeqqamut pitsaanerpaaq ujartorlugu inatsisitigut aaqqiissutissanik peqangaanngitsoq ersarippoq. Allatut oqaatigalugu anaanaasut ataataasullu naligiinnerusumik meeqqaminnut attaveqarsinnaanerat eqqarsaatigalugu naleqqunnerusumik eqqarsariaaseqarnikkut Ilaqtariit pillugit Inatsit nutarterneqarlunilu naleqqussarneqartariaqarpoq.

Meeqqamut pitsaanerusutut nalilerneqarpat ataataasup meeqqaminik tigungminnisinnaanera pitsanngorsaaavineqartariaqarpoq, tassami meeqqat ataataminnik attaveqarnissartik soqutigalugulu pisariaqartittarmassuk. Meeqqat illugiimmik angajoqqaaminnut attaveqarnissaminnut pisinnaatitaaffiat ilaatigut Naalagaaffiit Peqatigiit Meeqqat pillugit isumaqatigiissutaanni, artikel 9-mi aamma 18-mi allassimapput.

Pissutsinik pitsanngorsaanerup ilaatuttaaq aaqqiagiinngissuteqarnerni isumaqatigiissitsiniarnernut periarfissat aamma qimerloorneqartariaqarput, tassa aaqqiagiinnginnerni meeqqat pisariaqartitaasa salliutinneqarnissaat aallaavigalugit nunarput tamakkerlugu ilaqtariit aaqqiissutissanik nassaarsinnaanerat pitsanngorsaaavigalugu, imaanngitsoq akerleriissutigineqartoq avissaarutaasoq pingaarnertut aallaavigalugu. Tamatuma saniatigut angajoqqaap aappaanit tamanilluunniit meeqqamik peqateqarnissaq eqquutsinneqanngippat, meeqqallu angajoqqaaminik tamanik attaveqarnissaa meeqqamut pitsaanerussatut nalilerneqarpat, taava aaqqiagiinngissutsinik isumaqatigiissitsiniartoqarsinnaaneranut imaluunniit allatigut aaqqiiniartoqarsinnaaneranut iliuseqarnissartoqartariaqarpoq.

Naak Ilaqtariit pillugit Inatsit danskit inatsisaasa ataaniikkaluartoq, Naalakkersuisullu naatsorsuutigineqarsinnaasutut inatsimmut atuuttumut pitsanngorsaatisanik siunnersuuteqarumaaraluartut, aaqqiagiinnginnerni isumaqatigiissitsiniarnernut periarfis-sanik ammaassinisaaq ilanngullugu, taava tamanna naammattutut isiginngilarput.

Taamaattumik pisami matumani inuppassuarnik equiffiusartumi pitsanngor-saanissamut sapiissuseqartoqartariaqarpoq taamatullu danskit inatsisaannut innersuussiinnartarneq qimallugu.

Inuit Ataqtigiinniit tigussaasumik, aaqqiissutissartaqartumik ammasumillu oqalinnisaaq neriuutigaarput.